

插图本中国古代史料集成

(第一輯)

二四

綫裝書局

大明會典卷之七十三

禮部三十一

大宴樂

洪武間定

殿內脩食樂

樂器

麾竿一

祝一

敔一

搏拊一

琴四

瑟二

簫四

笙四

笛四

塤二

箎二

排簫一

鐘一

磬一

應鐘一

樂章

一奏炎精開運之曲

炎精開運篤生

聖皇。

大明御極。遠紹虞唐。河清海晏。物阜民康。威加夷獠。
德被戎羌。八珍有薦。九鼎馨香。鐘鼓鏜鏜。宮徵
洋洋。怡神養壽。理陰順暢。保茲遐福。地久天長。

二奏皇風之曲

皇風被八表。熙熙聲教宣。時和景象明。紫宸開繡筵。
龍袞曜朝日。金爐裊祥煙。濟濟公與侯。被服麗
且鮮。列座侍

丹扆。磬折在周旋。羔豚升華俎。玉饌充方圓。初筵
奏南風。繼歌賡載篇。瑤觴欣再舉。拜俯禮無愆。
同樂及斯辰。於皇千萬年。

奏平定天下之舞

舞士三十二人。皆左執干。干長三尺五寸。上闊
一尺。下廣六寸。朱質。上畫雉羽。中畫升龍雲氣。

右秉威。威長二尺五寸。硃紅漆柄。金妝威斧。分
為四行。每行八人。舞作發揚蹈厲。坐作擊刺之
狀。皆冠黃金束髮冠。紫紛纓。青羅生色畫舞鶴
花窄袖衫。白生絹襯衫。錦領。紅羅銷金太袖窄
袍。紅羅銷金裙。皂生色畫衣。沿襖。白羅銷金汗
袴。藍青羅銷金沿。紅絹擁項。紅結子。紅絹束腰。
塗金束帶。青絲大絛。錦臂鞞。綠雲頭皂靴。舞師
二人。執旌以引之。旌長七尺五寸。硃紅漆柄。金
龍吞口。懸五色羽九層。每層用塗金寶蓋。紅絲
絛穿末垂絲結子。皆冠黃金束髮冠。紫紛纓。青

羅大袖衫。白絹襯衫。錦領。塗金束帶。綠雲頭皂靴。

樂章

清海宇

拔劍起淮土。策馬定寰區。王氣開天統。寶曆應乾符。武畧文謨。龍虎風雲初。業初將軍星繞弁。勇士月彎弧。選騎平南楚。結陣下東吳。跨蜀驅胡。萬里山河壯。

帝居

三奏眷皇明之曲

赫赫

上帝。眷我

皇明。大命既集。本固支榮。厥本伊何。育德

春宮。厥支伊何。藩邦以寧。慶延百世。澤被羣生。及
時為樂。天祿是膺。千秋萬歲。永觀厥成。

奏撫安四夷之舞

舞士十六人。東夷四人。推髻於後。繫紅銷金頭
繩。紅羅銷金抹額。中綴塗金博山。兩旁綴塗金
環。明金耳環。青羅生色畫衣。大袖衫。紅生色領
袖。紅羅銷金裙。青銷金裙沿。紅生絹襯衫。錦領。

塗金束帶。烏皮鞋。西戎四人。間道錦纏頭。明金
耳環。紅紵絲細褶襖子。大紅羅生色雲肩。綠生
色沿。藍青羅銷金汗袴。紅銷金沿。繫腰合鉢。十
字泥金數珠。五色銷金羅香囊。紅絹擁項。紅結
子。赤皮靴。南蠻四人。綰朝天髻。繫紅羅生色銀
錠。紅銷金抹額。明金耳環。紅織金短襖子。綠織
金細褶短裙。絨綿袴子。間道紵絲手巾。泥金項
牌。金珠纓絡。綴小金鈴。錦行纏。泥金獅蠻帶。綠
銷金擁項。紅結子。赤皮靴。北狄四人。戴單于冠。
貂鼠皮簷。雙垂髻。紅銷金頭繩。紅羅銷金抹額。

諸色細褶襖子。藍青生色雲肩。紅結子。紅銷金
汗袴。繫腰合鉢。皂皮靴。四夷各為一行。舞作拜
跪。朝謁喜躍俯伏之狀。舞師二人。執幢以引之。
幢長七尺五寸。硃紅漆柄。金龍吞口。懸玉綵羅
幢五層。每層綴五色銷金吹帶。末垂紅粉結子。
皆戴白捲簷羶帽。塗金帽頂。一撒紅縷紫羅帽
襪。紅綠金繡襖子。白銷金汗袴。藍青銷金沿。塗
金束帶。綠擁項。紅結子。赤皮靴。

樂章

小將軍

大明君。定宇寰。

聖恩寬。掌江山。東虜西戎。北狄南蠻。手高擎寶貝盤。
殿前歡。

五雲宮闕連霄漢。金光明照眼。玉溝金水聲潺湲。
潁潁觀。趨蹌看。儀鑒嚴肅百千般。威人心膽寒。

慶新年

虎豹關。文武班。五綵間。慶雲朝霞燦。黃金殿。喜
氣增。丹墀內。仰。

聖顏。翠遶紅圍錦繡班。高樓十二欄。笙簫趁紫檀。僊。

音韻。瑤纂按。拜舞齊歌謠讚吾。

皇萬壽安

過門子

定宇寰。定宇寰。掌江山。撫百蠻。謳歌拜舞仰祝讚。萬萬年。

帝業安。

四奏天道傳之曲

馬負圖。子天道傳。龜載書。子人文宣。義畫封。子禹疇敘。

皇極建。子合自然。綿綿曆數歸。

明主祥麟在郊威鳳舞九夷入貢康衢謠。

聖子神孫繼

祖武垂拱無為邁前古

奏車書會同之舞

舞士三十二人。左執籥。籥長一尺五寸。硃紅漆
笙竹為之。上開三竅。右秉翟。翟長三尺五寸。硃
紅漆柄。金龍吞口。上綴雉羽五層。每層用塗金
寶蓋。紅絲絛穿末。用紅綠結子。分為四行。每行
八人。舞坐作進退舒徐揖讓升降之狀。皆冠黑
光描金方山冠。青紛纓。衣素紅羅大袖衫。紅生

絹襯衫。錦領。紅羅擁頤。紅結子。塗金束帶。白絹
大口袴。白布鞵。茶褐鞋。舞師二人。執翽以引之。
翽長七尺五寸。硃紅漆柄。金龍吞口。懸白鷺羽
九層用塗金寶蓋。紅絲絛穿末。垂紅絲結子。冠
服與舞士同。惟大袖衫用青。不用紅羅領紅結
子。

樂章

泰階平

乾坤清寧。治功告成。武定禍亂。文致太平。郊則
致其禮。廟則盡其誠。卿雲在天。甘露零。風雨時

若百穀登。禮樂雍和。政刑肅清。

儲嗣既立。封建乃行。讒佞屏四海。賢俊立朝廷。玉帛鐘鼓陳兩楹。君臣賡歌揚頌聲。

五奏振皇綱之曲

周南詠麟趾。卷阿歌鳳凰。藹藹稱多士。為楨振皇綱。赫赫我

大明。德尊踰漢唐。百揆修庶績。公輔理陰陽。我冠正襟佩。都俞在高堂。坐令八紘內。熙熙民樂康。氣和風雨時。田疇見豐穰。獻禮過三爵。歡娛良未央。

奏百戲承應

六奏金陵之曲

鍾山蟠蒼龍。石城踞金虎。千年王氣都。于今歸
聖主。六代繁華經幾秋。江流東去無時休。誰言天塹
分南北。英雄豈但嗤曹劉。我

皇昔住濠梁屋。神遊天錫真人服。提兵乘勢渡江來。
詞臣早獻金陵曲。歌金陵。進珍饌。諧八音。繼三
歎。請觀漢祖用兵時。為嘗馮異滹沱飯。

奏百戲承應

七奏長楊之曲